

# Persatuan/Kelab: Ke Arah Melahirkan Bakal Pemimpin Negara

Oleh : Shahril Anuar Abdul Ghalim & Nurul Nisha Mohd Shah

(Pensyarah Fakulti Komunikasi dan Pengajian Media Kampus Rembau)

Universiti bukan sahaja berfungsi melahirkan produk graduan yang cemerlang dari sudut akademik, tetapi juga berperanan sebagai platform penerapan ciri-ciri kepimpinan melalui kewujudan kelab dan persatuan yang bernaung dibawahnya. Kelab dan persatuan merupakan aset sesebuah universiti dalam melahirkan pelajar yang lengkap dengan pengalaman dan kemahiran kepimpinan. Latihan kepimpinan diperoleh dengan keterlibatan pelajar secara langsung dalam pengurusan sesuatu kelab ataupun persatuan melalui aktiviti-aktiviti yang telah disusun bersesuaian dengan misi dan visi penubuhannya.

Bakat kepimpinan yang ada dalam diri seseorang pelajar mampu digilap dengan keterlibatan mereka dalam pengurusan kelab/persatuan. Kebolehan mengurus, membuat keputusan, bertindak sebagai penggerak dan bekerjasama sesama ahli

persatuan akan memberi pengalaman berharga sebagai persediaan untuk bergelar pemimpin. Sudah tentu tidak ramai yang mampu untuk melakukannya buat kali pertama apabila menyertai kelab/persatuan tetapi konsep belajar melalui pengalaman adalah amat penting kerana pelajar akan mempelajari seni kepimpinan itu secara berperingkat melalui proses semulajadi yang bakal mematangkan mereka.

## **Kepimpinan Melalui Program**

Program-program yang dianjurkan setiap semester bakal membuka ruang dan peluang kepada pelajar untuk menimba pengalaman dari segi pengurusan yang berteraskan objektif sesuatu program yang dilaksanakan. Sudah pasti, ianya bukan perkara mudah untuk direalisasikan sesuatu pengurusan acara itu dan keberkesananannya adalah



bersifat subjektif iaitu berdasarkan kejayaan sesuatu program yang dianjurkan. Kerja berpasukan yang diterapkan sepanjang acara berlangsung merupakan pengalaman asas bagi menerap ciri kepimpinan di kalangan pelajar. Keterlibatan mereka secara aktif akan mendorong sifat tanggungjawab dalam mencapai keberkesanan sesuatu program yang diilhamkan.

Pengurusan masa dan pengorbanan tenaga merupakan perkara yang perlu ketika aktif berpersatuan. Pelajar harus bijak dalam mengatur aktiviti harian agar tidak terbeban kerana tanggungjawab yang digalas. Ia bukanlah perkara yang mudah, memandangkan pelajar juga mempunyai jadual pengkuliah yang telah ditetapkan sebagai keutamaan. Faktor kawalan diri dan fokus dalam menentukan keutamaan apabila menjejak kaki di menara gading haruslah jelas. Di sinilah, kewibawaan, disiplin dan kestabilan emosi sebagai bakal pemimpin diuji. Keutamaan akademik harus didahulukan dan pada masa yang sama tanggungjawab berpersatuan tidak ditinggalkan. Keseimbangan inilah yang melengkapkan bakal graduan sejurus mereka melangkah keluar dari kehidupan kampus.

### **Bimbingan Pensyarah**

Pensyarah penasihat perlu memainkan peranan dalam proses menggilap bakat kepimpinan pelajar. Pengalaman pensyarah amat perlu untuk dikongsi dengan pelajar melalui bimbingan secara berterusan. Melalui program yang dianjurkan atas nama persatuan/kelab, pensyarah mampu untuk menerapkan ilmu kepimpinan di luar konteks pembelajaran di dalam kelas. Ini bermaksud penerapan ilmu kepimpinan pensyarah penasihat adalah secara praktikal dan berkesan. Pelajar akan

mendapat bimbingan melalui gerak kerja berpersatuan seperti merancang aktiviti berpanduan fungsi persatuan, membentuk pasukan kerja, membuat keputusan berdasarkan situasi sebenar, penyelesaian masalah sekiranya wujud dan pelbagai lagi.

Bimbingan secara tidak formal ini mampu menyelinap dengan lebih berkesan dan memberikan impak tanpa disedari. Pelajar lebih mudah untuk berkomunikasi, menyuarakan pandangan dalam kumpulan, membuat keputusan secara kolektif antara ahli dan membuat rujukan kepada pensyarah penasihat dengan cara yang lebih santai berbanding pengajaran di dalam kelas. Mesejnya adalah sifat kepimpinan dan minat terhadap kepimpinan akan mudah terserlah apabila pelajar berpersatuan. Pensyarah penasihat perlu bijak mengesan bakat kepimpinan yang ada di peringkat awal aktiviti berpersatuan supaya kelompok pelajar berkenaan dipersiapkan dan diberi peluang untuk menjadi pemimpin pelajar di peringkat fakulti mahupun di peringkat universiti. Matlamatnya mudah iaitu universiti bukan hanya melahirkan para cendekiawan akademik tetapi juga melahirkan pemimpin pelapis kepada negara.

Secara sedar atau pun tidak, bakat kepimpinan adalah umpama suatu hasil seni yang harus dihargai, digilap dan diletak ditempat yang sepatutnya. Jika tidak ianya akan pudar dan mungkin lenyap hanya kerana ia tidak dinilai dengan cara yang sepatutnya. Persoalannya, mampukan kelab/persatuan yang bernaung dibawah universiti melahirkan pemimpin masa hadapan yang lengkap dengan pakej dan ciri-ciri kepimpinan yang unggul?